

## 景印重修莒志序

國有史郡縣有志其爲文獻可徵則一也事必循跡溯其源書尙詳實欲不謬追先德昭信來者莫非期永式焉莒在周爲少昊封國今爲四百里大縣故流風穆如宏邈左挹海隅居當南北之衝地則守治繁艱其志乘舊者散軼殘闕又加今俗萬殊懼後皆無所述士紳關心者嘗有私稿但剗刪公世非一家之事也迨中華民國鼎革歲甲戌國步粗安官紳協議重修設局於賈氏花園徵聘莊太史心如任總纂分纂及與其事者均邑之鴻儒可謂濟濟一時余不才亦忝廁足其間由之郇廚鼎鼐不遺滌刀俎吹薪火等役如是而已衆議借鏡武功登封郟城諸志之精粹並列兩洋法制黨政新猷之峻德舉例凡四以成其書盧明府序莊太史敘例盡

詳不復贅。是志也。詳不失簡。文不奪質。謂其依範而述也可。謂其創作亦無不可。三載事峻。治裝歸。短燭撫劍而論史。霜晨插菊而聯吟。以及兵匪壓境。培斂農商。無不長形夢寐中。丁丑日人入寇。蒸民離散。共黨乘之。莒成荒墟。余入蜀山居八年。日降後東遊金陵。逢趙子阿南。得莊太史卒於闕里之耗。往哭其墓。遍詢莒友。知修志諸子。或遇害或不詳其踪。時路猶梗。每遙望而弔之。徐蚌禍作。狩臺衆庶追隨。又逢阿南倍相親。不數載亦作古。亟趨撫棺盡慟。噫。賈園盛集。惟余一人矣。比聞大陸行馬列法。改文字焚書。國粹鮮克有存。史有齊曾兩度喪國。皆依莒助重興。中樞因撫鮑叔語。於行都通衢鑄曰母忘在莒。勵衆圖恢復也。余讀之。其感奮之情。更有異於人者。而莒人自必又甚於余矣。政院主計處秘書唐君立生。乃志

局文牘戟符公哲嗣。函云全臺求莒志十數年不得。有流陽契友吳洽民。知其如此。檢所存芝加哥大學中國方志目錄。列有重修莒志。全部都二十冊。遂函莒人羅宏文氏及立生。繼由吳氏洽借。在芝景印一部。於今春運臺。思之事甚奇。桑梓厚德。吳氏忠謀。豈謂偶然。踰日立生再函。附在芝影印樣模。云擬在臺重印。並徵序。觀物百感交集。恍如賈園雨窗。握管話舊。不圖距五十年。再作馮婦。頓忘耄荒。不文。遽諾之。是志也。湮於本國。得於他邦。有呵護歟。乃感格歟。抑天之不喪斯文歟。或禹甸之重光禎祥歟。必有其一。爰歷綴其原委。以觀厥後。古云有志竟成。果能永誓毋忘。焉知來朝之奇。不更奇於今日之奇。若夫探古於且于樂壘。浴風於流水浮丘。詠歌之餘。當回憶寓臺之母。忘在莒。或捧此志書。轉向告曰。毋忘在臺。毋

忘在臺，如斯企望，余亦不懈於菑之父老。

中華民國六十九年庚申仲春歷下李豔炳南氏謹識

## 重修莒志序

莒本古國。其幅員殆較今縣境爲狹。秦以後爲郡爲縣爲州而復爲縣。疆域界劃亦多存疑。其輿圖山水建置經制文物之散見羣籍者十無二三。此宋賢創作方志論者謂有裨國史守土之吏當視爲急務者。況世變日新。關係政教愈切。而復值舊聞放失之後乎。莒志自勝清嘉慶間。邑令許氏紹錦續修。迄今又百餘年。中經張氏承燮。蔣氏楷。及邑紳管氏廷獻等先後倡修。張氏僅創體例。蔣管屬稿未就。旋復閣置。前任宿松唐君劍青。徇各區區長之請。呈准省府。規畫未就。而唐君去職。民國二十二年十二月。少泉奉令代理。下車伊始。莒人士復以爲言。余曰。此吾責也。乃延邑耆宿。

莊心如太史董其成。復聘李君炳南。周君召亭。莊君德符。趙君阿南。分襄厥事。二十三年三月開局編纂。值匪患方殷。嚴城晝閉。而諸君子操觚不輟。罔間昕夕。星霜再歷。成書凡七十七卷。都二十冊。少泉昔負笈燕市。時研政籍。瀏覽方志。種別浩繁。不可悉讀。讖陋所知。蒐輯之富。殆罕與此書比倫。昔萬季野論修史。宜尚詳實。謂所著明代史藁。繁蕪倍於宋史。且非不知簡之爲貴。恐後之人務博而不知所裁。故先爲之極。使知吾所取者有可損。而所不取者必非其事。與言之真。而不可益也。今之志書。有關地方政教。爲後來考鏡之資。尤重於史。得茲巨製。網羅參伍。融貫新舊。舉全邑之輿圖。山水建置。經制文物。一一紀實。以待後之治國聞者。要刪

焉。蓋與萬氏論史之旨。先後同符。視康對山武功志以簡勝。洪北江登封志以擬古勝。陸祁孫續郟城志以修辭勝者。其用意固不侔矣。少泉治莒二載。愧乏政蹟。念莒人愛余之殷。依依不忍去。惟冀世變少戢。歸耕故里。棲遲蓮池之側。徜徉濰水之上。重披此編。宛如浮來朝爽。流水清流。毗盧古閣。望諸故壘。歷歷在目。更難忘干戈擾攘之際。諸君子風雨一燈。商訂義例時也。河北清苑盧少泉序。





## 重修莒志序

方志者具有時代性者也。修現代之方志，必具現代之眼光。應現代之需要，所有纂述詳略之間，自宜深切注意，未容率爾從事也。吾國在昔，省有省志，府有府志，縣有縣志，甚至鄉有鄉志，里有里志，方志之作，亦云盛矣。而其囊括一鄉一里之志，成爲一代文獻，上備省志之採擇，下作行政之標準者，厥惟一縣之志。然則縣志顧不重哉。莒志始自明成化，迄於清嘉慶，中間雖屢經修輯，而其內容所載，大抵沿襲舊例，無大變動。殆亦時代使然歟。民國二十二年冬，省令各縣修志，其明年盧前縣長少泉聘請邑紳莊心如先生任總纂。二十四年年終，編輯蕝事，校印未竣，而解職以去。本

年六月。余承乏斯邑。履政之初。雖因簿書鞅掌。緝捕勞形。未遑過問志乘之事。然竊以爲莒古國也。亦巖邑也。自周初至今三千有餘歲。其間因革損益。古今異宜。固不待言。卽以民國二十餘年而論。世事日趨複雜。所有政治之改進。社會之遞嬗。物產經濟之消長。農工商業之盈虛。日新月異。而歲不同。必不能一一悉如古所云。當斯時而言修志。倘無現代之眼光。博通之學識。斟酌今循名核實。以求適當。則書成而後。或於現代潮流之動向。經濟文化之發展。容有未合。將何以信今而傳後也。故修現代之縣志。其事倍難於往昔。今賴莊先生等之力。全志告成。志之總例有四。曰圖。曰記。曰表。曰志。而以子目分類相屬。所詳者或甄錄前志。或增補。

闕遺。或加之以考證。或附之以名著。凡所纂述。要皆以紀實爲指。歸所略者。大都無關世道人心。國計民生之記載。而又博考典禮。廣搜金石碑版。以補前志之缺。莊先生等之用心。可謂精且勤矣。披覽一過。雖不敢謂盡合現代之需要。而其綜括古今。足備將來徵文獻者之采擇。則所敢斷言也。是爲序。

中華民國二十五年十一月獻縣牛介眉